



სახელმწიფო შესყიდვების  
სააგენტოს თავმჯდომარის  
გ ა ნ კ ა რ გ უ ლ ე ბ ა



KA080185654069819

№ 1246

05 / მარტი / 2019 წ.

**შპს „გზამშენი - 7“-ის გაფრთხილების შესახებ**

**შემსყიდველი ორგანიზაცია:** ქალაქ თბილისის მუნიციპალიტეტის მერიის დიდუბის რაიონის გამგეობა;

**ტენდერის ნომერი:** NAT180000196;

**შესყიდვის ობიექტი:** 45200000 – მთლიანი ან ნაწილობრივი სამშენებლო სამუშაოები და სამოქალაქო მშენებლობის სამუშაოები;

**მიმწოდებელი:** შპს „გზამშენი - 7“ (ს/ნ: 405097336);

**წერილობითი შეტყობინების საფუძველი:** სახელმწიფო შესყიდვების შესახებ ხელშეკრულებით ნაკისრი ვალდებულებების არაჯეროვანი შესრულება.

**აღწერილობითი ნაწილი**

**1. ადმინისტრაციული წარმოების დაწყება**

1.1. სახელმწიფო შესყიდვების სააგენტოში 2019 წლის 11 იანვარს წარმოდგენილ იქნა ქალაქ თბილისის მუნიციპალიტეტის მერიის დიდუბის რაიონის გამგეობის 2019 წლის 11 იანვრის №32-0119011400 წერილობითი შეტყობინება (რეგისტრაციის № 252), რომლითაც სააგენტოს ეცნობა შპს „გზამშენი - 7“-ის (ს/ნ: 405097336) მიერ NAT180000196 ელექტრონული ტენდერის საშუალებით დადებული 2018 წლის 27 თებერვლის №1.1.10/30/027 სახელმწიფო შესყიდვის შესახებ ხელშეკრულებით ნაკისრი ვალდებულებების არაჯეროვანი შესრულების თაობაზე.

1.2. შპს „გზამშენი - 7“-ს სააგენტომ, სახელმწიფო შესყიდვების ერთიან ელექტრონულ სისტემაში მის პროფილში მითითებულ ელექტრონული ფოსტის მისამართზე levan.beqauri@gmail.com, 2018 წლის 22 იანვრის № 242 წერილით აცნობა სააგენტოში შემსყიდველი ორგანიზაციის წერილობითი შეტყობინების წარმოდგენის თაობაზე და, სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-5 მუხლის მე-5 პუნქტის შესაბამისად, სთხოვა ხსენებულ საქმეზე განმარტების წარმოდგენა. მიმწოდებელს განმარტება არ წარმოუდგენია.

**2. შემსყიდველი ორგანიზაციის პოზიცია**

შემსყიდველი ორგანიზაციის წერილობითი შეტყობინების თანახმად, მიმწოდებელმა არაჯეროვნად, კერძოდ, არასრულად შეასრულა მხარეთა შორის გაფორმებული 2018 წლის 27 თებერვლის № 1.1.10/30/027 სახელმწიფო შესყიდვის შესახებ ხელშეკრულებით ნაკისრი ვალდებულებები. შესაბამისად, მას შემსყიდველი ორგანიზაციის 2019 წლის 9 იანვრის № 32-01190092227 წერილით ეცნობა ხელშეკრულების ცალმხრივად შეწყვეტის თაობაზე.

**3. მიმწოდებლის პოზიცია**

მიმწოდებელს ადმინისტრაციული წარმოების ფარგლებში განმარტება არ წარმოუდგენია.

#### **4. სააგენტოს მიერ დადგენილი გარემოებები**

4.1. 2018 წლის 8 იანვარს ქალაქ თბილისის მუნიციპალიტეტის მერიის დიდუბის რაიონის გამგეობამ გამოაცხადა NAT180000196 ელექტრონული ტენდერი გზის სამუშაოების (CPV45233140) შესყიდვის მიზნით.

4.2. სატენდერო კომისიის 2018 წლის 13 თებერვლის № 4 სხდომის ოქმით, ტენდერში გამარჯვებულად გამოვლინდა შპს „გბამშენი - 7“ (ს/ნ: 405097336) და იგი მიწვეულ იქნა ხელშეკრულების გასაფორმებლად.

4.3. მხარეთა შორის 2018 წლის 27 თებერვალს გაფორმდა №32-01190092227 სახელმწიფო შესყიდვის შესახებ ხელშეკრულება, რომლის თანახმადაც, მიმწოდებელს უნდა შეესრულებინა დაზიანებული ქუჩების მიმდინარე შეკეთების სამუშაოები, ორმოული შეკეთებისა და შიდა ეზოების სარეაბილიტაციო სამუშაოები ხელშეკრულების გაფორმებიდან 2018 წლის 1 დეკემბრამდე, ეტაპობრივად, შემსყიდველი ორგანიზაციის წერილობითი მოთხოვნის (კონკრეტული მისამართი, შესასრულებელი სამუშაოების დეტალური აქტი, ტექნიკური დოკუმენტაცია და ვადები) შესაბამისად. ხელშეკრულების ღირებულებად განისაზღვრა 1 218 217,98 ლარი, ხოლო მოქმედების ვადად – 2019 წლის 30 იანვარი.

4.4. მხარეთა შორის გაფორმებული 2018 წლის 5 დეკემბრის შეთანხმებით, ხელშეკრულებით ნაკისრი ვალდებულებების შესრულების ვადად განისაზღვრა 2018 წლის 20 დეკემბერი.

4.5. მიმწოდებელს შემსყიდველი ორგანიზაციის 2018 წლის 12 დეკემბრის №32-0118346692 წერილით ეცნობა, რომ მას სამ მისამართზე დასასრულებელი ჰქონდა სამუშაოები და ხსენებული სამუშაოების 2018 წლის 20 დეკემბრამდე დაუსრულებლობის შემთხვევაში, შემსყიდველი ორგანიზაცია გაატარებდა ხელშეკრულებით გათვალისწინებულ ღონისძიებებს.

4.6. საქმეში არსებული 2018 წლის 31 დეკემბრის ინსპექტირების № 3 აქტითა და ქალაქ თბილისის მუნიციპალიტეტის მერიის დიდუბის რაიონის გამგეობის ინფრასტრუქტურული პროექტების მართვისა და პროექტების განყოფილების უფროსის 2019 წლის 9 იანვრის № 32-0119009507 მოხსენებითი ბარათით დგინდება, რომ მიმწოდებელმა სამუშაოები შეასრულა არასრულად.

4.7. მიმწოდებელს შემსყიდველი ორგანიზაციის 2019 წლის 9 იანვრის № 32-01190092227 წერილით ეცნობა ხელშეკრულების ცალმხრივად შეწყვეტის თაობაზე.

4.8. საქმეში არსებული მხარეთა შორის გაფორმებული მიღება-ჩაბარების აქტებით დგინდება, რომ მიმწოდებელმა შეასრულა 1 016 317,61 ლარის ღირებულების სამუშაო, რაც ხელშეკრულების საერთო მოცულობის 83%-ს შეადგენს.

#### **სამოტივაციო ნაწილი**

#### **5. შემაჯამებელი დასკვნა**

საქმეში არსებული მტკიცებულებებისა და გარემოებების შეფასებისა და ურთიერთშეჯერების საფუძველზე, სააგენტო მიიჩნევს, რომ შპს „გბამშენი - 7“-ს უნდა მიეცეს გაფრთხილება.

#### **6. გამოყენებული სამართლებრივი აქტები**

სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესი და პირობები“.

#### **7. სამართლებრივი შეფასება**

7.1. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-3 მუხლის მე-4 პუნქტის „ბ“ ქვეპუნქტის თანახმად, სახელმწიფო შესყიდვის ნებისმიერი საშუალებით განხორციელებისას, გარდა კონსოლიდირებული ტენდერისა, პრეტენდენტის/მიმწოდებლის შავ სიაში დარეგისტრირების საფუძველია, თუ მიმწოდებელმა ვერ შეასრულა ან არაჯეროვნად შეასრულა ხელშეკრულებით ნაკისრი ვალდებულებები. იმავდროულად, აუცილებელია, რომ ხელშეკრულების მოქმედების ვადა იყოს გასული ან ხელშეკრულება ვადაზე ადრე იყოს შეწყვეტილი.

7.2. იმავე წესის მე-7 მუხლის მე-2 პუნქტის შესაბამისად, საქმეში არსებული გარემოების გამოკვლევის, შეფასებისა და ურთიერთშეჯერების შედეგად, სააგენტო ადგენს, არსებობს თუ არა პრეტენდენტის/მიმწოდებლის შავ სიაში დარეგისტრირების საფუძველი. იმ შემთხვევაში, თუ არსებობს ამ მუხლის მე-4 პუნქტით გათვალისწინებული გარემოებები, სააგენტო იღებს გადაწყვეტილებას პრეტენდენტის/მიმწოდებლის შავ სიაში დარეგისტრირებაზე უარის თქმის შესახებ, ხოლო იმ შემთხვევაში, თუ არსებობს პრეტენდენტის/მიმწოდებლის შავ სიაში დარეგისტრირების საფუძველი, სააგენტო, ამ მუხლის შესაბამისად, იღებს გადაწყვეტილებას პრეტენდენტის/მიმწოდებლის გაფრთხილების ან შავ სიაში დარეგისტრირების შესახებ.

7.3. განსახილველ შემთხვევაში, დგინდება, რომ მიმწოდებელმა არასრულად შეასრულა სახელმწიფო შესყიდვის შესახებ ხელშეკრულებით ნაკისრი ვალდებულებები. შესაბამისად, სააგენტო მიიჩნევს, რომ არსებობს მიმწოდებლის გაფრთხილების ან შავ სიაში დარეგისტრირების საფუძველი.

7.4. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-3 პუნქტის შესაბამისად, გაფრთხილების ან შავ სიაში დარეგისტრირების შესახებ გადაწყვეტილების მიღებისას, სააგენტო, საქმისთვის მნიშვნელობის მქონე გარემოებებთან ერთად, დამატებით ითვალისწინებს დარღვევის სიმძიმეს, პრეტენდენტის/მიმწოდებლის მანამდე მიღებული გაფრთხილების თუ შავ სიაში რეგისტრაციის ფაქტ(ებ)ს, მისი სახელმწიფო შესყიდვებში მონაწილეობის აქტივობას.

7.5. სახელმწიფო შესყიდვების სააგენტოს თავმჯდომარის 2015 წლის 29 ოქტომბრის № 19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-5 პუნქტის თანახმად, გაფრთხილების შესახებ გადაწყვეტილება მიიღება იმ შემთხვევაში, თუ შემსყიდველი ორგანიზაციის მიერ წარდგენილი წერილობითი შეტყობინება სრულად აკმაყოფილებს ამ წესის მე-3 და მე-4 მუხლებით განსაზღვრულ მოთხოვნებს, მაგრამ პრეტენდენტის/მიმწოდებლის შავ სიაში დარეგისტრირებით დაირღვევა თანაბრობის პრინციპი. გაფრთხილება გამოიყენება ერთხელ და მოქმედებს ერთი წლის განმავლობაში. გაფრთხილებულ მიმწოდებელთა სიას სააგენტო განათავსებს ვებგვერდზე.


7.6. სააგენტო მიიჩნევს, რომ შემსყიდველი ორგანიზაციის წერილობითი შეტყობინება აკმაყოფილებს ზემოხსენებული წესის მე-3 და მე-4 მუხლებით განსაზღვრულ მოთხოვნებს. განსახილველ შემთხვევაში, მართალია, მიმწოდებელმა არაჯეროვნად შეასრულა ხელშეკრულებით ნაკისრი ვალდებულებები, მაგრამ სააგენტო ითვალისწინებს იმ გარემოებას, რომ მიმწოდებელმა შეასრულა 1 016 317,61 ლარის ღირებულების სამუშაო, რაც ხელშეკრულების საერთო მოცულობის 83%-ს შეადგენს. ამდენად, სააგენტო მიიჩნევს, რომ, ამ ეტაპზე, შპს „გზამშენი - 7“-ის შავ სიაში დარეგისტრირებით დადგება არათანაბრობიერი შედეგი და მიზანშეწონილია მის მიმართ გაფრთხილების გამოყენება.

### სარეზოლუციო ნაწილი

სააგენტომ იხელმძღვანელა სახელმწიფო შესყიდვების სააგენტოს თავმჯდომარის 2015 წლის 29 ოქტომბრის №19 ბრძანებით დამტკიცებული „შავი სიის წარმოების წესისა და პირობების“ მე-7 მუხლის მე-5 პუნქტით და დაადგინა:

1. შპს „გზამშენი - 7“-ს (ს/ნ: 405097336) 2019 წლის 6 მარტს მიეცეს გაფრთხილება.
2. დაევალოს სახელმწიფო შესყიდვების სააგენტოს ინფორმაციული ტექნოლოგიების დეპარტამენტს სააგენტოს ვებგვერდზე შესაბამისი ჩანაწერის გაკეთება.
3. ეს განკარგულება შეიძლება გასაჩივრდეს მისი ოფიციალური გაცნობის დღიდან ერთი თვის ვადაში, თბილისის საქალაქო სასამართლოს ადმინისტრაციულ საქმეთა კოლეგიაში (ქ. თბილისი, დავით აღმაშენებლის ხეივანი, მე-12 კმ, №6), კანონმდებლობით დადგენილი წესით.

თავმჯდომარე



ლევან რაზმაძე